

佛说解夏经 1 卷

No. 63 [No. 26(121), Nos. 61, 62, No. 99(1212), No. 100(228), No. 125(32.5)]

佛说解夏经

西天译经三藏朝奉大夫试光禄卿明教大师臣法贤奉 诏译

如是我闻：

一时，佛在王舍城迦兰陀竹林精舍，与五百苾刍众俱，皆是阿罗汉，诸漏已尽所作已办，除诸重担逮得己利，尽诸有结心善解脱。唯一苾刍现居学位，世尊已为授记，见法得法当证满果。

尔时，世尊安居既满，当解夏时，于十五日与苾刍众敷座而坐。会众坐已，是时，佛告苾刍众言：「我今已得梵行寂静，是最后身，以无上药断除诸病。我之弟子，了知诸法皆已通达，是故我今说解夏法。诸苾刍众！我于夏中所有身口意业，汝等可忍？」

是时，尊者舍利弗闻佛语已，从座而起偏袒右肩，右膝着地合掌向佛，而白佛言：「世尊！如佛所说，我今已得梵行寂静，乃至身口意业可忍者。我等知佛，身口意业无诸过失，我等苾刍今无可忍。于意云何？我佛世尊，难调者能调，无止息者善为止息，无安隐者而善安慰，未寂静者令得寂静，如来善了正道，善说正道，开示正道，乃至我等乐声闻菩提者，佛为善说，令声闻等如理修行而证圣果。是故我等，于佛世尊身口意法而无可忍。」

尔时，尊者舍利弗白佛言：「世尊！我今对佛身口意业所有不善，求佛可忍。」

佛告舍利弗：「汝今所有身口意业，我当忍可。于意云何？汝，舍利弗！具戒多闻，少欲知足，断诸烦恼，发大精进，安住正念，具等引慧、闻慧、捷

慧、利慧、出离慧、了达慧、广大清净慧、甚深慧、无等慧，具大慧宝。未见者令见，未调伏者令得调伏，未闻法者而为说法，具瞋恚者而令欢喜，能为四众说法无倦。譬如金轮王子，而受灌顶继绍王位，依法而治。汝，舍利弗！亦复如是，为我之子，受灌顶法绍法王位，如我所转无上法轮，如我漏尽证得解脱。是故汝，舍利弗！所有三业我今忍可。」

时舍利弗闻佛忍可，投诚礼谢。复白佛言：「世尊！如佛为我忍可三业，于此会中五百苾刍，身口意业所有不善，唯愿世尊，亦如是忍。」

佛告舍利弗：「五百苾刍所有三业，我亦可忍。于意云何？此五百苾刍皆是阿罗汉，诸漏已尽所作已办，除诸重担逮得己利，尽诸有结心善解脱，唯一苾刍现居学位，而此苾刍我已授记，见法得法当证满果。舍利弗！是故我于五百苾刍所有三业，皆悉可忍。」

尔时，舍利弗重白佛言：「世尊！我与五百苾刍众等，所有三业佛已可忍。我今有疑，当复启请。愿佛世尊！为我分别。世尊！此五百苾刍中，几苾刍得三明法？复几苾刍得俱解脱？复几苾刍得慧解脱？」

佛告舍利弗：「此五百苾刍中，九十苾刍得三明法，九十苾刍得俱解脱，余者苾刍得慧解脱。舍利弗！如是苾刍，尽诸烦恼，皆住真实。」

尔时会中有一尊者，名嚩儼舍，作如是念：「我今对佛苾刍众前，以解夏伽陀伸于赞叹。」是时尊者嚩儼舍，作是念已，从座而起，偏袒右肩右膝着地，合掌恭肃，说伽陀曰：

「解夏十五日，	清净行律仪，
五百苾刍众，	悉断烦恼缚。
皆尽诸漏法，	而证圣果位，
内寂外善调，	解脱而离有。
尽生死边际，	所作皆已办，
无明我慢结，	断尽无有余。
我佛最上尊，	断诸邪念法，
及断有漏法，	善除爱病苦。
爱灭不复生，	离取大师子，
尽诸有怖畏，	唯我佛世尊。
譬如金轮王，	千子常围绕，

善治四天下，    调伏四海边。  
又如战得胜，    为最上调御，  
声闻得三明，    离死法亦然。  
佛子皆如是，    证灭不复生，  
我今礼法王，    无上大日尊。」

是时瞿儼舍苾刍说此伽陀已，复还本座。

尔时尊者舍利弗与诸苾刍，闻佛宣说解夏之法，心生快利，踊跃欢喜，信受奉行。

## 佛说解夏经

---

【经文信息】大正藏第 01 册 No. 0063 解夏经

【版本记录】CBETA 电子佛典 Rev. 1.11 (Big5)，完成日期：2010/08/24

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，张文明大德提供，北美某大德提供，法雨道场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】

---